

# ЙОЧА КНИГАГУДЫШТО — ЙОМАК КЕЧЕ

"Морко мланде" газетын кодшо номерыштыже Г.Сошинан "Школышто - курчак театр" вуймутан статьяжым лудым. Тушто Энерсола тун школ пелен курчак театрын пашам ыштымыже нерген серыме ыле. Любовь Викторовна Павлова шке кид дене сылне модыш курчакым ышта. "Меранын шочмо кечыже" йомакым марий тувыран курчак-влак дене модаш тунгалмышт нерген пеш онайын чучо. Чынак, Морко районышто тыгай мастар ен-влакын улмышт пеш куандара да кугешнаш веле кодеш.

Мемнан йоча книгагудына пеленат курчак театр шукертсек пашам ышта. Сандене эше ик тыгай театр улмылан пеш йывыртенна. Мемнан курчак театрна нергенат газет лаштыкыште шуко гана серенна. Йоча-влаклан курчак дене представленийым ятыр гана ончыктым. Шукерте огыл "Театр да йоча-влак" театризованный представлений кечым эртарышна. Йоча-влак ныл йомакым модын ончыктышт. Морко 1-ше №-ан школын 4 "в" классыштыже тунемше-влак "Курочка Ряба" йомакым кызытсе жаплан кельштареныт. Нуным тиде классын вуйлатышыже Анелия Георгиевна Михайлова ямдылен. Руш калыкын "Реве" йомакшым Морко 1-ше №-ан школын 1-ше "а" классысе тунемшышт (туныктышышт Людмила Гурьева) тиде йомакым руш йылме дене модын ончыктышт. 2-шо



"а" классын тунемшыже-влак (туныктышышт Маргарита Максимова) тудымак марла ончыктышт. Йоча-влакын марий йылмылан шуман улмышт шижалте. Нуно изи артист гаяк лийыныт. Кажныже шке рольжым почын ончыкташ тыршен.

Тыгак йоча книгагудо пашаен-влак "Колобок" музыкальный йомакым курчак-влак дене модын ончыктышна. Модмына чылалан келшен.

Тиде кечын йоча-влак театр нерген шуко онайым презентаций гоч пален налыч: могай театр-влак улыт, ко тушто пашам ышта да моло йодышлан ынде нуно вашмутым пуэн кертыт. 2019 ий - Театрын идалыкше, садлан театр нерген шуко палаш кулеш.

Йоча пагытыште шукынжо артист лияш шонат, очыни. "Кö артист лийнеже?" манын йодмемлан кидым шукын нöлтальыч. Кумдан палыме артистын тунгалтыш корныжо изирак классыште модмо роль гычак тунгалеш огыл мо? Тудынат пашаже куштылго огыл. Репетицийже, рольысо мутым тунеммыже, тургыжланымашыже - чылажат вийым налеш. Сценыште кеч ик гана шкендым ончыктет гын, артистын пашажым турьыс умылен кератат. Артистын пашажым аклыше, театрым йöратыше тунам лият, кунам шкежат сценыште кеч ик гана иктаж рольым модын ончыктет.

**Т.ВЛАДИМИРОВА,**  
Морко йоча книгагудын пашаенже